



Komisija za očuvanje nacionalnih spomenika, na osnovu člana V stav 4. Aneksa 8. Općeg okvirnog sporazuma za mir u Bosni i Hercegovini i člana 39. stav 1. Poslovnika o radu Komisije za očuvanje nacionalnih spomenika, na sjednici održanoj od 9. do 15. septembra 2008. godine, donijela je

## ODLUKU

### I

**Prirodno i historijsko područje – Nekropola sa stećcima i nišanima Grčko groblje/Svatovsko groblje (Greblje) u selu Donji Močići, općina Stari Grad – Sarajevo**, proglašava se nacionalnim spomenikom Bosne i Hercegovine (u daljnjem tekstu: nacionalni spomenik).

Nacionalni spomenik čine nekropola sa 61 stećkom, 15 nišana i jedan osamljeni stećak koji se nalazi izvan nekropole.

Nacionalni spomenik se nalazi na prostoru označenom kao k.č. 759/1, 760/1 i 761/1 (stari premjer), ZK izvadak broj 793, k.č. 702/2 (stari premjer), ZK izvadak broj 795, dio k.č. 833/1, ZK izvadak broj 33, k.o. Nahorevo, te dio k.č. 2486/2, posjedovni list broj 13, k.o. Nahorevo II, k.č. 1102, posjedovni list broj 101, k.č. 1115, posjedovni list broj 103, k.č. 1117/1, posjedovni list broj 103, k.č. 1192, posjedovni list broj 91, (novi premjer), k.o. Močići, općina Stari Grad – Sarajevo, Federacija Bosne i Hercegovine, Bosna i Hercegovina.

Na nacionalni spomenik se primjenjuju mjere zaštite utvrđene Zakonom o provedbi odluka Komisije za zaštitu nacionalnih spomenika, uspostavljenog prema Aneksu 8. Općeg okvirnog sporazuma za mir u Bosni i Hercegovini ("Službene novine Federacije BiH", br. 2/02, 27/02, 6/04 i 51/07).

### II

Vlada Federacije Bosne i Hercegovine (u daljnjem tekstu: Vlada Federacije) dužna je osigurati pravne, naučne, tehničke, administrativne i finansijske mjere za zaštitu, konzervaciju i prezentaciju nacionalnog spomenika.

Komisija za očuvanje nacionalnih spomenika (u daljnjem tekstu: Komisija) utvrdit će tehničke uvjete i osigurati finansijska sredstva za izradu i postavljanje informacione ploče sa osnovnim podacima o spomeniku i odluci o proglašenju dobra nacionalnim spomenikom.

### III

S ciljem trajne zaštite nacionalnog spomenika, na prostoru definiranom u tački I stav 3. ove odluke, utvrđuju se sljedeće mjere zaštite:

- dopušteni su isključivo istraživački i konzervatorsko-restauratorski radovi, uključujući i one koji imaju za cilj prezentaciju spomenika, uz odobrenje federalnog ministarstva nadležnog za prostorno uređenje (u daljnjem tekstu: nadležno ministarstvo) i stručni nadzor nadležne službe zaštite naslijeđa na nivou Federacije Bosne i Hercegovine (u daljnjem tekstu: nadležna služba zaštite);

- obavljanje radova na infrastrukturi dopušteno je uz odobrenje nadležnog ministarstva i stručno mišljenje nadležne službe zaštite;

- prostor spomenika bit će otvoren i dostupan javnosti, a može se koristiti u edukativne i kulturne svrhe;

- izvršiti uklanjanje bespravno sagrađenog objekta – vikend kuća na k.č. 1192, posjedovni list broj 91, k.o. Močioci, koji narušava prirodno-historijski ambijent;

- prevrnuti stećak u formi sanduka vratiti na izvornu lokaciju;

- izvršiti restauraciju i konzervaciju stećaka i nišana;

- izvršiti postavljanje ograde na zaštićenom području, uključujući radius od 10 m od granice nacionalnog spomenika.

Vlada Federacije dužna je posebno osigurati provedbu sljedećih mjera:

- izradu geodetskog snimka postojećeg stanja nacionalnog spomenika;

- izradu Projekta sanacije, restauracije i konzervacije nekropola.

Projekat sanacije, restauracije i konzervacije treba sadržavati:

– arheološko istraživanje;

– čišćenje spomenika od lišaja i mahovine i saniranje oštećenja;

– uređenje nekropola sa uklanjanjem samonikle vegetacije;

– uređenje staza za siguran pristup nacionalnom spomeniku;

– postavljanje klupa, korpi za otpatke, putokaza, oznaka za kretanje i sl.;

– zaštitu prirodno-historijskog područja bez narušavanja postojećeg ekološkog sklada;

– postavljanje granica prirodno-historijskog područja radi očuvanja i zaštite izvornog stanja;

– održavanje protoka gena između populacija i teritorija kada je u pitanju divlji životinjski svijet;

– redovno održavanje spomenika;

– izradu i provedbu programa prezentacije nacionalnog spomenika.

U cilju zaštite prirodno-historijskog područja bez narušavanja postojećeg ekološkog sklada, utvrđuje se **buffer zona** koja obuhvata prostor označen kao k.č. 2486, 2487, 2488, 2489, 1099/1, 1101, 1100, 1183, 1114, 1116, 1117/2 i 1191. Navedene parcele povezane su izohipsama:

- Sa južne strane izohipsa br. 1128,9 povezuje se sa izohipsom br. 1297,9 u pravcu sjevera;

- Na sjevernoj strani izohipsa br. 1297,9 se povezuje sa izohipsom br. 1250 i produžava se na zapadnu stranu;

- Na zapadnoj strani granica se spušta u pravcu juga do dodirne tačke sa izohipsom br. 1100, nakon čega se povezuje preko k. č. 2486, 2487, 2488 i 2489, sa izohipsom br. 1128,9.

U buffer zoni nije dopuštena eksploatacija kamena, sječa šume izuzev sanitarne sječe, lociranje potencijalnih zagađivača okoline, izgradnja industrijskih objekata i magistralne infrastrukture i svih objekata koji u toku izgradnje ili u toku eksploatacije

mogu da ugroze nacionalni spomenik.

#### IV

Stavljaju se van snage svi provedbeni i razvojni prostorno-planski akti koji su u suprotnosti sa odredbama ove odluke.

#### V

Svako, a posebno nadležni organi Federacije Bosne i Hercegovine, kantona, gradske i općinske službe, suzdržat će se od poduzimanja bilo kakvih radnji koje mogu oštetiti nacionalni spomenik ili dovesti u pitanje njegovu zaštitu.

#### VI

Ova odluka dostavit će se Vladi Federacije, nadležnom ministarstvu, nadležnoj službi zaštite i općinskom organu uprave nadležnom za poslove urbanizma i katastra, radi provedbe mjera utvrđenih u tač. II - V ove odluke i nadležnom općinskom sudu radi upisa u zemljišne knjige.

#### VII

Sastavni dio ove odluke je obrazloženje sa pratećom dokumentacijom, koje je dostupno na uvid zainteresiranim licima u prostorijama i na web stranici Komisije (<http://www.aneks8komisija.com.ba>).

#### VIII

Prema članu V stav 4. Aneksa 8. Općeg okvirnog sporazuma za mir u Bosni i Hercegovini, odluke Komisije su konačne.

#### IX

Ova odluka stupa na snagu danom narednog dana od dana objavljivanja u «Službenom glasniku BiH».

Ovu odluku Komisija je donijela u sljedećem sastavu: Zeynep Ahunbay, Martin Cherry, Amra Hadžimuhamedović, Dubravko Lovrenović i Ljiljana Ševo.

**Predsjedavajuća Komisije**  
**Ljiljana Ševo**

Broj: 02-02-68/07-17  
10. septembra 2008. godine  
Sarajevo